

Negociacion a tranca

AWE MAINTA CASO DI HILTON CASINO TA SIGUI DEN CORTE

ORANJESTAD(AAN) -- Contrario na loke tur cos tabata musta, negociacion entre e grupo di Aruba Hotel Enterprises y FTA a tranca y awor atrobe mester bay Juez.

Manera ta conoci, diabierna ultimo 4 di Novem-

ber, tratamiento di e caso mester a continua caminda e partidonan mester informa Juez con a para cu e reunionnan.

Juez mr. Giltay durante tratamento di e caso anteriormente, a bisa bon cla cu si e gruponan no por yega na un acuerdo, e lo dicta sen-

tencia.

Diabierna e caso mester a sigui 2'or di merdia, pero e gruponan a notifica Juez cu tin un solucion na horizonte y pesey Juez a pospone tratamento di e caso te ayera.

Informacion cu DIARIO ta dispone di dje ta musta cu

na dado momento negociacionnan a tranca.

DIARIO a drenta den contacto cu Pontilius di FTA, kende a musta cu nan a keda sorprendi pa e actitud di Aruba Hotel Enterprises.

Pontilius mes a indica cu e negociacionnan tabata bayendo hopi bon esta cu ya a keda palabra cu e trahadornan lo traha 7 hora pa dia. E unico punto di discusion tabata e trahamento ariba bispo di aña.

Diadomingo a tuma lugar un votacion entre e empleadonan caminda e mayoria a dicidi pa bay traha bispo di aña pero a cambio mester bin otro compensacion o sea pago extra.

Ora FTA a notifica Aruba Hotel Enterprises, nan a laga sa cu nan no kier sinta na mesa mas cu mediador y cu nan kier pa Juez sigui cu e caso.

Pontilius ta haya cu Aruba

Hotel Enterprises ta di mala fe. Ta asina cu e abogado di FTA a pidi na Corte pa sigui cu e tratamento y ta asina cu awe mainta 10'or, Corte lo bay sigui cu e caso.

Seguramente Juez lo bay scucha di ambos partido, con leu a yega cu e negociacion pa finalmente e tuma un decision. Manera ta conoci Aruba Hotel Enterprises a bay Juez pa termina e relacion di trabao cu e 76 trahadornan trahando na Hilton Casino. A base di e ponencianan cu a worde treci padilanti di ambos partido, Juez a haya cu lo ta mihor nan sinta na mesa pa yega na un solucion. Despues di negociacionnan a yega na un acuerdo caba pa loke ta trata e horanan di trabao. E unico punto cu a keda ta e trahamento ariba bispo di aña. DIARIO lo bay sigui e caso aki di cerca pa asina tene nos lectornan al tanto.

HOMBER A PONE ARMA DI FUEGO NA CABEZ DI GUARDIA

El a somenta y un "manhunt" a cumenza!

ORANJESTAD (AAN): Un "manhunt" formal a tuma lugar Diadomingo den oranan di anochi, specialmente den vecindario di Eagle Beach y riba Sasakiweg. Varios unidad di Polis tabata coriendo tur rond, enbusca di un persona hopi peligroso.

Polis a busca e supuesto homber sin por a localize.

Segun informe cu e anochi ey na un hotel den vecindario, algun guardia lo a haya problema cu un homber. Segun e Hefe di Seguridad di e Hotel, di inicial J.L. a declara, cu el a worde notifica cu su personal lo a

haya un discusion.

Ora cu J.L. a bay pa atende e homber el a bin nota cu diripiente e homber a saca un arma color di silver, y a apunta esaki riba dje, mas preciso na su cabez!

Despues di e acto aki e homber desconoci a core bay. Polisnan a ser poni na

altura, y rapidamente a cumenza busca den vecindario.

Mientras tanto J.L. lo a worde avisa pa pasa na Departamento di Recherche na unda e tin cu denuncia e caso. DIARIO a compronde cu posiblemente e identidad di e homber cu a comete e acto aki ta conoci!

GLASNAN DI CAS TA DESAPARECE

ORANJESTAD (AAN): Un pareha a presenta cerca autoridatnan un denuncia di ladroncia y menaza contra di e homber di inicial E.L.L.

Segun e pareha di inicial G. cu e homber a horta algun shutters di glas den nan cura di cas. Mientras un dia prome tambe e homber lo ta in intercambio di palabra cu e señora di cas.

Den e intercambio di palabra e homber E.L.L. a menaza e señora di lo mate.

Relaciona cu e menaza serio aki, e amenazador a worde deteni y transporta pa Warda di Polis. Durante di interrogacion el a declara cu el a bay cu e glasan cu conocimiento di e señora.

